

REGIONAL NEWS BULLETIN
HEADLINES (EVENING)

Date – 28/03/2025

Time - 18:30 Hrs

1. Chief Minister Pu Lalduhoman tlangram lo neih thlakna tha tak chu kuhva leh rubber chin a ni a ti.
2. Sorkar hnathawk inzawmkhawm pawl FMGE&W chuan Mizoram Universal Health Care Schemeah Sorkar hnathawk te huam tir ve lo turin Chief Minister hnenah an thlen.
3. Sawrkar laipui chuan Central sawrkar hnuaia thawkte Dearness Allowance leh Pensioner tana Dearness Relief chu zaa 2 in a ti pung.
4. Vawiin chhun khan Myanmar-ah na takin tum hnih lir a nghing.

<><><>

CM

Chief Minister Pu Lalduhoman Mizoram ram ngaw tha sawp chhe tu tlangram loh nei, hlawk baw si lo thlakna tha tak chu kuhva chin leh rubber chin a ni a ti.

Vawiina Mizoram New Capital Complex-a ATI Auditorium-a Land Resources Soil & Water Conservation Department buatsaih science thiamna hmanga kuhva rah chin dan inzirtirna hun a hmanpuinaah he thu hi Chief Minister chuan a sawi a. Chief Minister chuan kuhva chu Mizoramah hectare 30,000 velah chin mek a nih thu a sawiin a hralhna a tluan chuan eizawnna tlak a nih thu leh chhungkaw tam tak pawhin lo neih bansana an chin thu a sawi a ni.

Chief Minister chuan Soil department hmalaknain Zamuang leh Chemphaiah kuhva processing plant an din dawn thu leh sum pawh NEC atangin cheng vbc 7 leh nuai 43 pekchhuah a nih tawh thu a sawi a, tender pawh chhuah mek a nih thu sawiin April thlaah hna an thawh tan theih a beisei thu a sawi a. Chief Minister chuan an sorkar veleah dan loa Mizorama kuhva rah lut thin tihtawp tumin thapui an thawh nghal tih a sawi a. Tun hma ngaihtuah chuan kuhva tawlhru tute an chepin an tawmim tawh hle a ni a ti a.

Training-ah hian kuhva chingtu mi 200 chuang telin science thiamna hmanga kuhva chin dan bakah kuhva ei chhe tu laka inven dan te zirtir an ni a. Mizoram Kuhva Chingtu Pawl General Body Meeting leh Inthlanin a chhunzawm baw a ni.

<><><>

HEALTH MINISTER

Health Minister Pi Lalrinpuii chuan damdawi to leh chemical chak tak taka siam te ai chuan taksa tana him, tlawm zawk leh mitin ban phak Ayush hmanga natna enkawl uar a tul thu a sawi.

Vawiina Aijal Club-a Mizoram AYUSH Doctors' Association General Conference Vawi 17-na a hmanpuinaah he thu hi sawiin Minister chuan World Health Organization pawhin ramhmul damdawi hmanga natna enkawl hlutna leh pawimawhna hriain WHO Traditional Medicine Strategy pawh a duan hial thu a sawi a. AYUSH hmanga natna enkawl chu a himin a tha tih sawiin tun aia chawilar tum turin AYUSH doctor kalkhawm te a fuih a ni.

Mizoram AYUSH Doctors' Association General Conference-ah hian National AYUSH Mission leh State Medicinal Plants Board chungchang inzirtirna hun hman a ni a. Inthlan leh General Body Meeting-in a chhunzawm a, chawhnu lamah intihhlamna hun an hman baw a ni.

<><><>

MSU

Mizorama cheng hnam peng hrang hrangte inkarah inhuatna chi tuh thei thubelhchian dawlo thehdarh fo thin chungchang chhui turin Mizo Students Union chuan Aizawl Police Station ah FIR a thehlut.

Social media hrang hrang Youtube channel, Whatsapp, Facebook page, Telegram leh Instagram-ah te Mizorama cheng hnam peng hrang hrangte inkarah inhuatna chi tuh

theih thubelhchian dawlo thehdarh thin te zawnchhuaha hrem ngei an nih theih nan, Aizawl Police Station, Cyber Crime ah First Information Report an thehlut a ni.

Mizoram thenawm Myanmar leh Manipur-ah Zohnahthlak leh Zohnahthlak inkar ah innghirnghona awm fo thin chu pawl a tih thu sawiin, MSU chuan Social media ah hian thubelhchian dawl lo, Mizo hnam peng emaw tan hriat nuam lo tak thehdarh anih fo chuan nghawng lian zawk leh pawl zawk, awlsam taka tharum thawhna a tihchhuah mai theih thu sawiin hetiang thil tih chingte hi Dan hmanga hrem an nih ngei theih nan MSU chuan a tawp thlengin hma a la zel dawn a ni, an ti.

<><><>

FMGEW

Sorkar hnathawk inzawmkhawm pawl Federation of Mizoram Government Employee & Workers (FMGE&W) te chuan Mizoram Universal Health Care Scheme (MUHCS) ah Sorkar hnathawk te huam tir ve lo turin Chief Minister hnenah lehkha an thawn.

Sorkar hnathawk inzawmkhawm pawl chuan an pawl Special Assembly-ah sorkarin MUHCS a duan chu a systemah kimchang lo leh felhlel a la tam avangin tuna an system duan chu siam fel a nih hma chu mipui leh pensioner te hmantir an nih pawhin anni sorkar hnathawkte chu hman tir ve lo va CSS(MA) Rules 1944 hman zui tir ni se an ti a, Chief Minister hnenah pawh an thlen thu te, Chief Minister in a hova enzui a intiam tawh thu lehkhaah hian an sawi a ni.

MUHCS chu sorkar hnathawkte huama April thla tir atanga hman tan tura puan hnan an ni chu an hrethiamlo tih an sawi a, MUHCS hnuaiah an hlawh atanga pawisa cut sak an nih mai bakah an senso zawng zawng an bill thei chuang si lo tur chu manganthlak hle dawna an hriat thu an sawi a. MUHCS chu a system kal dan turte siam fel a nih hma chu sorkar hnathawkte huam tir ve lo turin Chief Minister an ngen nawn tih lehkhaah hian an tarlang bawk a ni.

<><><>

SAMUEL Z HRANGATE RETIREMENT

Akashvani Aizawl-a Assistant Director leh Head of Programme ni bawk, Pu Samuel Z Hrangate, IBPS chu a hna atangin a pension.

Pu Samuel Z Hrangate hi vawiin khan Akashvani thawktute leh duhsaktuten Akashvani Aizawl Multipurpose Hall-ah Cluster Head & Director Pu DR Lalropuia hoin thlahna hun an hmang a. Pu DR Lalropuia chuan vawiina thlah tak Pu Samuel Z Hrangate chu pension hun hlimawm tak hmanga Pathianin amah leh a chhungte a kaihhruai zel a duhsak thu a sawi a ni. Pu Samuel Z Hrangate pawhin thu sawiin sorkar hna a thawh chhungah amah duhsaktu leh a tlinlohnaa hliahkhuh tlat thin te chungah lawmthu a sawi bawk a ni.

Pu Samuel Z Hrangate hian kum 1989 khan Akashvani Aizawl chu Transmission Executive in a zawm a. Nikum khan Assistant Director-ah kaisangin Indian Broadcasting Program Service (IBPS) cadre-ah a lut a. Akashvani-ah hian kum 35 chhung hna hrang hrang chelhin a thawk a ni.

<><><>

MAMIT

Mamit District Women and Child Development Department District Hub for Empowerment of Women bultumin‘One Nation One Helpline Vehicle Rally’ tukin khan neih a ni a, Women & Child Development Director Pi Zoramthangi Chhangte chuan Mamit SP Office kawt atangin a vai liam.

Pi Zoramthangi chuan 181-Women Helpline, 1098-Child Helpline te chu an inthlunzawm vek tawha, hman tangkai a pawimawh hle a ni a ti.

Women & Child Development Director hian Mamit-a Women & Child Development hnuaia awm One Stop Centre, Observation Home leh Shakti Sadhan bakah Home hrang hrang te a tlawh a, W. Phaileng a Department hmun thenkhat a tlawh bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

LUNGLEI

Lunglei a veng pakhat, Hauruang chuan Lunglei Municipal Council huam chhunga awm ve an tlin lo ni a sawiin tal chhuah leh an duh.

Lungleia kan corr sawi danin, hemi chungchangah hian Joint Action Committee (JAC) an din a, JAC ah hian Hauruang Local Council leh NGO zawng zawng: YMA, MHIP, MUP te telin an khawtlang mipui tam ber zaa 99 dawn chu kuthnathawk a eizawng niin property tax an khawn atanga an khawtlang hmasawnna tur hnathawhna tur tax return phei chu a beithamin engtihnamah a ni dawn lova, hniam lam panna zawk tur a ni tih chu an ngaihda a ni a, Municipal area a awm ve kan la tlin lo a ni an ti.

Hei bakah hian NH 302, Lunglei leh Tlabung laih dawn khan zangnadawmna pek tur danah Urban area ang a sawi a ni a, a tak taka lo thlenin Rural area ang a chhut sak an ni leh Rate hniam lutuk a chhutsak an ni chu an hriatthiam loh thu an sawi bawk.

Hetihlai vek hian Zobawk pawhin LMC area atanga tal chhuah leh an duh thu an lo sawi tawh a, Congress party phei chuan Local Council thlan dawn khan Manifesto ah an lo dah tawh a ni.

<><><>

DA

Sawrkhar laipui chuan Central sawrkhar hnuaia thawkte Dearness Allowance leh Pensioner tana Dearness Relief chu zaa 2 in a ti pung a. Kumin January ni 1 atanga chhiar tan tur a ni ang. Sarwkar thutlukna hi Central sawrkhar hnuaia thawk mi nuai 48.66 leh pensioner nuai 66.55 ten an hmang thei dawn a ni.Hei bakah hian sawrkhar laipui chuan Electronic Component Manufacturing Scheme hnuaiah tanpuina sum cheng vaibelchhe sing 2 sang 2 pek a remti bawk a. Union I&B Minister Ashwini Vaishnaw chuan he scheme hian hna thar sing kua sang 1 chuang a siam belh tih a sawi a ni.

<><><>

EARTHQUAKE

Wawiin chhun khan Myanmar-ah na takin tum hnih lir a nghing. Wawiin lirnghingte hi a nat zawng tehna richter scale 7.7 leh 6.4 an ni a. Myanmar-a mandalay-a lei hmingthang Ava Bridge chu Irrawaddy luiah a chim a, in leh bungraw tam tak a chim chhe bawk nia thudawn a ni. Lirnghing intanna atanga km 900 vela hla Thailand khawpui Bangkok ah pawh hriat a ni a. Mi tam takin an awmna in tlanchhuakin hmun him lam an pan a ni.

Thailand Prime Minister Paetongtam Shinwatra chuan wawiin khan inhmukkhawm hmanhmawh a ko nghal a. Thai defence minister sawidanin mi 90 chin hriatlohin an awm mek a, mi 3 in chimin a delh hlum tih a sawi bawk.

Lirnghing hi Kolkatta leh Imphal-ah hriat a ni bawk. Prime Minister Narendra Modia chuan vawiina Myanmar leh Thailand-a lirnghing chu pawl atih thu sawiin mipuite an him ngei a beisei tih a sawi. Social media ah he thu hi tarlangin Pu Modia chuan lirnghing tuarte chhawmdawl turin India chu a inhawng reng tih sawiin External Affairs Ministry pawhin Myanmar leh Thailand sawrkhar an be pawp reng tih a sawi a ni. Hetihlai hian Thailand-a Indian Embassy chuan India mi harsatna tawh an awm chuan biak pawh theihna tur number a tichhuak a. Hei bakah hian Bangkok-a Indian embassy leh Consulate te chu an him tih a tarlang bawh a ni. Myanmar-ah chuan ram bial hmun rukah emergency puan niin heng zingah hian Naypyitaw leh Mandalay te pawh an tel a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 120-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawh ang.

<><><>